

Ipmila mihttomearri

Fargga mii fas basuhit juovllaid. Ja go mii doallat juovllaid, de lea buot nu čáppat go obage sáhhtá. Mii bassát viesuideamet. Mii činadit. Mii oastit skeaŋkkaid nubbi nubbaí. Mii dahkat dan maid sáhhtit vuoi buot lea fiinnis, ja vuoi buohkain lea nu buorre dilli go vejolaš.

Muhto: mii dat lea maid mii basuhit? Ii dat lean makkárga čáppa riegádahttinossodat Betlehemas. Dat lei stállja. Dat lei sihkkarit duolvvas ja heitot juohke láchkai.

Ja doppe de dáhpáhuvai: Máilmmi beasti riegádii. Profehta Jesaja lávlagis Hearná bálvleaddji gillá Jes, 53, 3 govviduvvo son ná:

*Son lei badjelgehččojuvvon, ja olbmuid hilggohas,
gibuid olmmái, buozalvassii oahpis,
gean ovddas olbmot čihke muođuideaset.
Son lei badjelgehččojuvvon, eatge mii atnán su maninge.*

Dát ii lean alla árvvus. Nagodit go mii oaidnit ahte Jesusa givrodan lea dat maid mii atnit headjuvuhtan?

Paulus čállá ná Jesusa birra 1. Kor. 1, 27: *Muhto dat mii máilmmis adnojuvvo jallavuhtan, dan Ipmil válljii vuoi beassá heahppašuhhtit viisásiid. Dan mii máilmmis adnojuvvo headjun, dan Ipmil válljii vuoi beassá heahppašuhhtit dan mii lea fámoláš.*

Jesus jorgala vulosoivviid min mihtidanvuogi. Dan maid mii atnit stuorisin, lea smávis su čalmmiin. Ja dat maid mii atnit unniin ja headjun, lea geahčemeahtun divrras su čalmmiin.

Dan stuorra miššonkonferánssas Arushas Tanzanias njukčamánu 2018 ságastalle “marginaliserejuvvon” olbmuid gohččuma dahje rávkama birra. Olbmot geat ellet geafivuodas, olbmot geat leat veahki haga, geat eai gula buori servvolašvuhtii, geat gillájit min badjelmearálašvuoda dihtii, geat gillájit dálkkádatroasu geažil, soađi geažil ja vuoigatmeahtunvuoda geažil; dát olbmot rávket ja hástalit min kristtalaččaid rikkis máilmmiguovlluin.

Sin vártnuhis veahkehisvuolta lea sin givrodan. Danin go sii leat seamma ollu olbmot geat leat sivdniduvvon Ipmila gova mielde ja searvevuhtii suinna, go earát ge. Dat hástalit ja rávket min duddjot vuoigatlaš máilmmi. Ja eambo go dan: sii čájehit ahte Ipmila buorit attáldagat, árbmu ja ráhkisvuolta, ii leat čadnon lihkkos ja olbmo čalmmiin buresbirgejumi eallimii. Go dat lea headjuvuodas ahte mii oaidnit Ipmila givrodaga ja fámu.

Dán mii várra oaidnit ge 1. Kor. 15,43: *Dat mii gilvojuvvo árvvoheapmin, čuožžila hearvásin. Dat mii gilvojuvvo headjun, čuožžila fámolazžan.*

Dal juovllaid vuostá mus lea hástalusáš: oza riggodaga das mii min mielas lea heitot. Ii danin vuoi dat bissu headjuvuodas, geafivuodas ja gillámušas. Muhto vuoi oaidnit Ipmila, su gohččuma ja ráhkisvuoda das maid olbmot eai ane árvvus.

Maiddá min gaskkas mii muhtomin oaidnit dán: go olbmot geain lea doaimmashehttejupmi dahje givssálaš buozanvuodát iluin oassálastet ipmilbálvalusas ja máidnumis. Go mii girkun veahkehit olbmuid geat dárbbášit veahki girku diakonijja bokte, leaš dál min boarrásiid gaskkas, dahje gárrenmirkogeavaheddjiid gaskkas dahje olbmuid gaskkas geat leat giddagasas. Dahje go veahkehit báhtareddjiid dahje earáid geat atnen “ruskkan borramušas” sihke dábálaš olbmuid gaskkas ja eiseválddiin.

Ipmila stuorisvuolta headjuvuodas. Mii galgat oaidnit, vuostáiváldit ja oskut. Ja mii rávkojuvvot ja hástaluvvot dahkat Ipmila buriid daguid olbmuid gaskkas geaid lusa son sádde min.

Arusha miššunkonferánssa julggaštusas lea čállojuvvon: «Min geaidnu máhttájeaddjin láide min eallit ja juogadit Ipmila ráhkisvuoda Jesusa Kristusa bokte go ohcat vuoiggalašvuoda ja ráfi vugiiguin mat eai gula dán máilbmái. (Joh 14, 27). Nu mii vástidit Jesusa gohččumii čuovvut su máilmmi marginaliserejuvvon guovlluin.»

Mun sávan buohkaide buressivdniduvvon juovlabasiid, illudettiin uhca mánáža dihtii, mihtiduvvon Ipmila mihttomeari mielde!

Olav Øygard

Bismma Davvi-Hålogalánda bismagottis